

Senza ideologia e cunter tuts

La candidatura da Linard Bardill pledenta plitost la «clientella» da la partida socialdemocrata

DAD ANDREAS CADONAU / ANR

■ **Ni dretg ni sanester mabain tut a gradora vul Linard Bardill politisar en la regenza grischuna. Cun ses sustegn nà da la scena culturala sa drizza sia candidatura plitost vers il candidat da la partida socialdemocrata. Lezza beneventa dentant la candidatura selvadia e valitescha ella per in enritgament da la democrazia.** Il president da la partida socialdemocrata grischuna, *Philipp Wilhelm*, vesa en la candidatura dal chantatur e publicist Linard Bardill in enritgament da la democrazia e dad avantatg per il suveran grischun dad avair a disposiziun ina pli gronda schelta da candidats. Per directa concorrenza per l'agen candidat *Peter Peyer* na valitescha el betg quella candidatura. Il president da la ps grischuna è persvadì da las fermezas da l'agen candidat, bain enragischà en la scena culturala è bainversà en dumondas economicas.

In potenzial grev da giuditgar

Il president da la partida ha puntuà che la ps sco l'agen candidat sajan insumma betg involvads en ils embrugls da la branscha da construcziun grischuna. La malcuntentientscha dal nov candidat per la regenza grischuna sa drizza dentant era vers la politica da cultura dal chantun Grischun e la responsabladad per quella politica giaschia tar il represchentant da la ps en la regenza grischuna, cusseglier guvernativ *Martin Jäger*. Diferentas giadas ha il nov candidat per las elecziun da la regenza attatgà il cusseglier guvernativ, sia politica da cultura e principalmain in dals exponents da la



Il politolog Clau Dermont vesa in tschert potenzial da protest en la candidatura da Linard Bardill.

FOTO Y. BÜRKLI

cultura grischuna. Philipp Wilhelm ha accentuà che la ps haja crititgà l'agir da l'agen represchentant en la regenza grischuna en connex cun la politica da personal al timun dal Museum d'art. E la ps saja s'engaschada per chattar novas e meglieras soluziuns en quella dumonda stada dispaivla.

Per act da protest valitescha il politolog *Clau Dermont* l'annunzia da Linard Bardill da candidar per la regenza grischuna. Dermont ha fatg attent a l'engaschi dal nov candidat per la regenza grischuna en connex cun la roschada al timun dal Museum d'art grischun. In protest ch'è sa drizzà cunter la politica

da personal dal cusseglier guvernativ *Martin Jäger*. Ina part da la motivaziun da candidar po senz'uter esser la malcuntentientscha persunala dal nov candidat vers la politica da cultura dal chantun Grischun, suppona il politolog. Sustegn per sia candidatura selvadia restschaiva Linard Bardill da divers expo-

nents da la scena culturala grischuna. Con che quest sustegn porta la finfinala al nov candidat en l'elecziun per la regenza e grev da giuditgar. Clau Dermont ha explitgà ch'il sustegn dad ina part da la scena culturala na possia betg purtar avunda vuschs per reussir en ina elecziun. Per avantatg valitescha il politolog l'enconuschiantscha da Linard Bardill en l'entir chantun. Grazia a sia cuntinuada pretschiantscha sco autur e chantatur. Vitiers vegn ina tscherta malcuntentientscha che regia actualmain en la populaziun grischuna pervia da las cunvegns da pretschs en la branscha da construcziun sancziunadas da la CumCo tar las interpresas da la Engiadina Bassa e Val Müstair. Clau Dermont suppona che quella situaziun pudessi senz'uter purtar al nov candidat ina ni l'autra vegh dar lur vuscha a l'elita politica existenta ni a persunas ch'èn vegnidas numnadas en connex cun il scandal da las cunvegns da pretsch.

Naginas undas grondas

Grondas undas na bitta la candidatura da Linard Bardill sco independent betg tar las ulteriuras partidas schebain ch'in è surprais da l'annunzia, sco per exempel il president da la partida cristiandemocrata grischuna *Stefan Engler*. Ord aspects democratics beneventa el ina ulteriura candidatura ch'augmentia l'elecziun al suveran grischun. La finfinala dettia quai anim al cumbat d'elecziun sche gliued engaschada stettia a disposiziun. Vinavant han ils exponents da las partidas grischunas puntuà il dretg da mintga bur-gais grischun da candidar per in post politic en il chantun Grischun.